

de formenti è stà scritto in Franza voy lassar venir formenti di Franza su l'ixola, perochè de qui val el formento lire 10 el starò.

223 *Del ditto, di 11 Novembrio, pur da Londra.*

Heri questi signori francesi andono a Granuzo, dove deteno l'hordine di San Michiel a questo Serenissimo Re. El prima se andò a messa; da poi reduti in camera, Soa Maestà si spoioe la vesta et rimase in saio, dove per il signor Gran maestro li fo messo indosso uno habito de la cavaleria, ch'è una vesta di pano-d'ariento a modo de uno mantello, che da tutte do le bande se tien sora le spale, et quella parte davanti et da driedo sta zoso. Questa vesta è ugnola, strichada de panno d'oro; atorno ditta insegna è una capa marina et uno ligame atorno atorno. Da poi li meseno al colo una colaina de valuta de ducati 300, che è la ditta insegna fata come era el friso nel mantello, zoè una capa tonda d'oro et uno legame de sie fili, et cussi de capa in legame, et de legame in capa. Al pendente di essa catena li è poi uno San Michiel piccolo armado conculcante el diavolo; ch'è la insegna de questa cavalaria. La vesta che 'l Serenissimo Re se spoio, era di pano d'ariento fodrà de bellissimi zebelini, fo data al fiol del preosto de quella cavalaria, ch'è francese, a chi toca per soi ordeni tal doni; la qual val da ducati 1000. Et ditto zentilhomio dete poi la sua a li camerieri del Re, che valea ducati 100, et lui si tene indosso quella del Re. Da poi el Re zurò li capitoli de la cavalaria, et si andò a pranzo. Da poi el disnar se balò, et fo fatte alcune representation; dove *etiam* se cenò, dove el Re balò, et *etiam* lo illustrissimo Gran maestro con la illustrissima principessa, et se consumò cussi tutta la notte. Li honori et apiaceri che son fati a questi signori oratori sono grandi et molti, et mostrano gran disposition verso el regno de Franza, perchè sperano da quello sentir frutto in questa carestia ch'è de qui hora de biave, et più che, de la farina che tutti qui manzano, la mità è farina de fava, et cussi si convien manzar. Et io ho parlato con questo merchadanti che afirmano a li molini haver visto cussi farsi, però che fevano pensier, non si potendo haver formento per mandar a quelle bande, de qui se potesseno haver almen de le fave; ma vedendo la cosa passar a questo modo, non li bastano l'animo a proponer de haver trata de fave, dubitando patir da questi popoli etc.

Scrive poi in materia de Stado altre particolarità, *ut in litteris*.

A dì 6, fo San Nicolò. Justa el solito el Serenissimo vestito di veludo cremexin, con el Collegio solamente fo a messa in la capella nuova in palazo, di San Nicolò; da poi se reduse in Collegio.

Vene l'orator de Franza monsignor de insieme con uno altro francese mandato qui per monsignor de Lutrech, da Parma, con lettere de credenza, chiamato monsignor Et sentati tutti, el ditto disse da poi molte parole, et richiese li danari se è ubligati dar per pagar 10 milia sguizari, ancora che non se habbi hauto el numero; *denum* che semo ubligati tener 12 milia fanti et non ne havemo 2000 in campo de qua, et 2000 in Toschana; per tanto se voy far ditto effecto, altramente che non se potria seguir l'impresa, con altre parole. Al che el Serenissimo li rispose: prima che havemo mandà a Soa Excellentia tanti danari, et li sguizari non erano in esser, et de fanti, che havemo acresudo el numero come se vede per le liste, et femo el debito nostro, et li pagemo li 5000 lanzineeh; con altre parole, ben ditte al proposito, *tamen* se conseierà, et con el Senato poi se li risponderà. Et lui solecità se li fesse risposta resoluta, et lassò la copia de la soa instruction etc.

Da Lodi, di sier Gabriel Venier orator apresso el duca di Milan, di Come era venuta la nova che quelli 200 fanti erano in Novara se havia reso a inimici, dubitando el Duca non vardino a Pavia, la qual terra è mal fornita de victuarie; dolendosi el Duca, zoè quelli soi col ditto Orator del nostro Governador et Provedador, perochè ussiti questi de Milan, che erano da fanti, et inteso Soa Excellentia andavano de là da Texin, et (*uà?*) che se rese Vegevano, scrisse dovesseno mandar 1500 fanti drio perchè Soa Excellentia faria li fanti soi et de là venirli a l'incontro, si che non potriano fuzer, et inimici saria stà rotti. Il qual Proveditor disse consultaria, poi le disse voleva aspetar risposta di Venetia etc.

Da Crema, di sier Andrea Loredan podestà et capitano, di 2. Avisa *etiam* lui inimici haver hauto Novara. Et nota: se ben Lutrech have la terra, la roca se teniva per cesarei, et li 200 fanti ducheschi erano in la terra se rese, et fono lassati andar.

Scrive ditto Podestà, qui sono lettere del campo di Roma, de 26, del zonzer li el secretario del reverendissimo Pixani, vien di Roma, con tutte quele